

Grad Novi Pazar

Skupština grada

Odbornička grupa SDA Sandžaka

Novi Pazar

15. maj 2021. godine

P R E D S J E D N I K U
SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG REZOLUCIJE O ZLOČINIMA NAD BOŠNJAČKIM NARODOM U SANDŽAKU**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i doneše na sjednici Skupštine grada koja će se održati 17. maja 2021. godine.

Predsjednik odborničke grupe

Ahmedin Škrijelj

PRIJEDLOG

U cilju izgradnje stabilnog i trajnog mira, sigurnosti, saradnje i povjerenja među narodima u Sandžaku;

Izražavajući najdublji pijetet prema žrtvama bošnjačkog naroda u Sandžaku i saosjećanja sa njihovim porodicama;

Potvrđujući privrženost antifašizmu, demokratiji, toleranciji, suživotu, i ravnopravnosti svih naroda i građana na prostoru Novog Pazara i Sandžaka;

Izražavajući zabrinutost zbog činjenice da zločini počinjeni nad Bošnjacima Sandžaka do danas nisu rasvijetljeni, niti su odgovorni procesuirani i kažnjeni;

Insistirajući na poštovanju utvrđenih činjenica, na pravnoj i moralnoj osudi odgovornih za zločine počinjene nad Bošnjacim Sandžaka;

Proklamujući svoj vrijednosni sud o kršenju elementarnih ljudskih prava i sloboda, policijskoj torturi, te drugim svirepim zločinima počinjenim u Sandžaku;

Skupština grada Novog Pazara na sjednici održanoj 17. maja 2021. godine,

a na osnovu člana 32. stav 1, tačka 20) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 147. Statuta grada Novog Pazara („Službeni list grada Novog Pazara“, broj 6/19), i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), donosi

REZOLUCIJU

o zločinima nad bošnjačkim narodom u Sandžaku

I

Skupština grada Novog Pazara izražava saosjećanje sa žrtvama zločina u Štrpcima, Sjeverinu, Kukurovićima i drugih zločina počinjenih nad Bošnjacima u Sandžaku i njihovim porodicama i traži od državnih organa hitno otkrivanje i identifikaciju posmrtnih ostataka žrtava.

II

Skupština grada Novog Pazara osuđuje saučesništvo tadašnjih državnih organa Republike Srbije i Savezne Republike Jugoslavije u planiranju, organizovanju i činjenju zločina u Štrpcima, Sjeverinu i Kukurovićima i drugim mjestima u Sandžaku nad civilima bošnjačke, hrvatske i drugih nacionalnosti.

III

Skupština grada Novog Pazara zahtjeva od državnih organa Republike Srbije da neodložno sprovedu brzu, efikasnu i djelotvornu istragu radi otkrivanja, procesuiranja i kažnjavanja svih

počinilaca, nalogodavaca, organizatora i podstrelkača zločina počinjenih nad civilima bošnjačke, hrvatske i drugih nacionalnosti u Štrpcima, Sjeverinu, Kukurovićima i okolnim selima, kao i zločina počinjenih u drugim mjestima u Sandžaku.

IV

Skupština grada Novog Pazara traži od državnih organa Republike Srbije da hitno utvrde propuste u postupanju državnih organa, nadležnih za sprovođenje vladavine prava, a koji su u skladu sa zakonom bili u obavezi da pravovremeno i profesionalno istraže i kazne pomenute zločine, ali su to propustili da urade, te da pojedince koji su načinili te propuste udalje iz institucija.

V

Skupština grada Novog Pazara traži od nadležnog tužilaštva u Republici Srbiji da zločine počinjene nad civilima bošnjačke nacionalnosti u Sjeverinu, Kukurovićima i okolnim selima u opštini Priboj tretira i kvalifikuje kao ratne zločine, na način kako je postupljeno u slučaju "Štrpcí".

VI

Skupština grada Novog Pazara izražava saosjećanje sa žrtvama montiranih političkih procesa i žrtvama policijske torture iz Novog Pazara i drugih mjesta u Sandžaku.

Skupština grada Novog Pazara traži od državnih organa Republike Srbije da žrtvama policijske torture obezbijedi ostvarivanje prava na pravično materijalno obešećenje i druge vidove reparacija.

VII

Skupština grada Novog Pazara zahtjeva od državnih organa Republike Srbije da se porodicama otetih i ubijenih žrtava zločina počinjenih u Štrpcima, Sjeverinu i Kukurovićima i drugim mjestima u Sandžaku prizna status civilnih žrtava rata, status raseljenih lica, kao i da im se obezbijedi pravična materijalna naknada.

VIII

Skupština grada Novog Pazara traži od Vlade Republike Srbije da realizuje program povratka izbjeglih, raseljenih i prognanih Bošnjaka, posebno u pograničnim područjima opštine Priboj, njihov održiv opstanak i život, kao i da preduzme sve potrebne mjere radi podizanja dostoјnih spomen obilježja žrtvama otmica u Štrpcima i Sjeverinu, kao žrtvama zločina u Kukurovićima.

IX

Skupština grada Novog Pazara zahtjeva od državnih organa Republike Srbije da kroz obrazovno - odgojni sistem Republike Srbije razviju obrazovne programe koji će budućim generacijama usaditi lekcije koje su izvučene iz prošlih genocida, ratnih zločina, etničkih čišćenja i zločina protiv čovječnosti, počinjenih nad bošnjačkim narodom i drugim narodima na prostoru bivše SFRJ, u cilju spriječavanja da se ponove.

X

Skupština grada Novog Pazara podržava donošenje i usvajanje zakonskih i drugih akata, a naročito Zakona o lustraciji, te preuzimanje mjera afirmative akcije koje će nedvosmisleno garantovati i osigurati zaštitu i puno ostvarivanje ljudskih i manjinskih prava te obezbijediti manjinskim narodima i etničkim zajednicama ravnopravnost u svim sferama društva i uvjete za političku egzistenciju.

XI

Ovu Rezoluciju dostaviti: Narodnoj skupštini Republike Srbije, Vladi Republike Srbije, MInistarstvu unutrašnjih poslova, MInistarstvu pravde, Ministarstvu za ljudska i manjinska prava i društveni dijalog, Tužilaštvu za ratne zločine, Misiji OSCE-a u Srbiji, Delegaciji EU u Srbiji i Bošnjačkom nacionalnom vijeću.

XII

Ovu Rezoluciju objaviti u "Službenom listu grada Novog Pazara".

SKUPŠTINA GRADA NOVOG PAZARA

Broj:

U Novom Pazaru, _____. _____. 2020. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Pravni osnov za donošenje ove odluke je sadržan je u:

- članu 32. stav 1, tačka 20) Zakona o lokalnoj samoupravi;
- članu 147. Statuta grada Novog Pazara
- članu 137. Poslovnika Skupštine grada Novog Pazara

Razlozi za donošenje odluke:

Usvajanjem ove Rezolucije Skupština grada Novog Pazara izražava pijetet prema žrtvama bošnjačkog naroda u Sandžaku i saosjećanje sa njihovim porodicama te potvrđuje opredjeljenje Grada Novog Pazara ka antifašizmu, demokratiji, toleranciji, suživotu, i ravnopravnosti svih naroda i građana na prostoru Novog Pazara i Sandžaka

Ovom Rezolucijom se još jednom pocrtava činjenica da zločini počinjeni nad Bošnjacima Sandžaka, do danas nisu rasvijetljeni, niti su odgovorni procesuirani i kažnjeni.

Na ovaj način Skupština grada, u ime građana Novog Pazara, proklamuje svoj vrijednosni sud o zločinima počinjenim u Sandžaku nad bošnjačkim narodom, kršenju elementarnih ljudskih prava i sloboda i policijskoj torturi čije su žrtve bili i građani Novog Pazara.

Insistirajući na poštovanju utvrđenih činjenica, na pravnoj i moralnoj osudi odgovornih za zločine počinjene nad Bošnjacim Sandžaka, ova Rezolucija predstavlja i jasano distanciranje od politike etničkog čišćenja, negiranja zločina i sistemske zaštite odgovornih za zločine počinjene nad Bošnjacima Sandžaka.

Ovom Rezolucijom, na legalan i legitiman, politički i pravno utemeljen način državnim organima Republike Srbije ukazuje se da sistem i institucije sistema više ne smiju biti sigurna kuća za odgovorne za zločine nad Bošnjacima.

Dješavanja u Sandžaku tokom provođenja kampanje etničkog čišćenja i organiziranog državnog terora zauzimaju posebno mjesto u kolektivnom sjećanju bošnjačkog naroda u Sandžaku iz čega proističe i obaveza Skupštine grada Novog Pazara, kao najvišeg organa vlasti glavnog grada Sandžaka, da se odredi po ovom pitanju i iskaže svoj jasan stav.

Donošenje ove Rezolucije predstavlja važan korak u suočavanju sa prošlošću i vraćanju povjerenja medju narodima a naročito rješavanju svih otvorenih pitanja između bošnjačkog i srpskog naroda.

Donošenje ove Rezolucije predstavlja civilizacijski odgovor na organizirani državni teror koji je režim Slobodana Miloševica proveo nad bošnjačkim narodom u Sandžaku.

Ovom Rezolucijom ukazuje se i na neophodno utvrđivanja odgovornosti ali i adekvatnog kažnjavanja odgovornih za teror i zločine koji su izvršeni nad Bošnjacima u Sandžaku.

Usvajanjem ove Rezolucije, predlažu se i konkretne mjera koje bi državni organi Republike Srbije trebali poduzeti kako bi se žrtvama navednih zločina i njihovim porodicama pružila satisfkacija i vratilo povjerenj u državne organe.

Finansijska sredstva za sprovođenje ove odluke nisu potrebna.